

E bissi kronk

Eiern Honnes iss in de letzde verrzeh Daach e bissi kronk gewese unn dut erst heit widder oofonge, ebbes ze schreiwe.

E bissi kronk – unn weil dess schunn long nimmi bassierd iss, hott de Honnes oogefonge driwwer noochzedenke, dasses in soim Alder zwaa Sorte Kronkheide gewwe dut: Die oo Sort, die nooch verrzeh Daach, drei Woche widder eweck iss, unn die onner Sort, die, wenn se erst emol kumme iss, nimmi verschwinne dut. Unn weil de nitt genau waaßt was ess dissmol iss, giehsde maskiert zum maskierte Dokder, der dut derr in die Aache gugge, dut meddem Kobb nigge unn während er ebbes uffschreiwe dut seeder: Drei Mal am Tag 30 Tropfen, dann sollte es bald besser sein. Und denken Sie bitte daran, wie alt Sie sind.

E bissi kronk, habb isch geschriwwe, weil isch hadd merr ebbes oigefonge, werr waaß wies bassierd iss. Unn donn hosde ebbes, mett dem de verrzeh Daach hinner nonner nimmi uff die Gass gieh unn nor omm Wohnstubbefenster de Rawe unn Atzele uffem Rase zugugge konnst. Unn host aach koon Appedit unn wennde trotzdem ebbes esse dust, hott dess Esse koon Geschmack unn Schluckbeschwerde hosde aach noch. Donn dut derr nix iwwerisch bleiwe als wie e Zeitlong dich nitt oozestrenge unn abzewadde, bisses vorbei iss mett dere Kronkheit.

Doo isses gut, dassde e Fraa host die disch versorsche dut, unn wennde donn e Bub host, der in de Näh mett soiner Familie lebt unn der zum Oikaafe, zum Müll unn onnern Sache rund ums Haus kimmt ohne dasser gerufe werdd. Die onnern Kinner, die e bissi weit eweck wohne unn dort mett ihrne Familie lewe, rufe ständisch oo unn du waaßt, soll irschend ebbes Schlimmes soi, donn sinn se sofort doo unn bleiwe bei derr. Unn die Nochbern dut onn de Hausdier klingelee unn frächt, ob se ebbes helfe odder ebbes oikaafe kennt.

Awwer aach Leit, onn die de nitt denke dust, rufe oo unn wenn de donn e bissi verzähle konnst wies derr gieht und du heerst, dassde derr gut Besserung winsche dun, donn gieht derrs Herz uff, weil su Mensche muss merr oofach gern hawwe.

Unn wenn de donn ebbes host, mett dem de doi Fraa oostegge konnst, donn lässde ständisch die Maske uff, hältst Abstand unn dust hoffe, dassde gesund bleibt. Unn ziehst e paar Nächst zum Schloofe ins ehemolische Kinnerzimmer um und krawwelsd dort unner die Deck.

Donn uff oomol merksde dasses besser werdd, du bist noch e bissi matt, awwer dess Esse fängt oo widder ze schmegge unn wennde oofängst, ins Mineralwasser e bissi Äbbelwoi ze schidde, donn waaßde, es gieht uffwärts, nor die Boo sinn halt noch e bissi waggelisch.

Eiern Honnes